

KƆRINTIDEENƆ TAKADA PLAADEE

Pɔlu kɔn Kɔrinti sɔsi gbɛnɔ 1:1-7:16

Yudea Yesudeenɔ kámasakɛna 8:1-9:15

Pɔlu gina kɔn a zĩndao 10:1-13:14

Làakarikpaɛna

¹ Mamɔma Pɔlu, Kirisi Yesu zĩri Luda pɔyezi guu kɔn wa gbɛ Timɔtio, wámbe wa takada kè kè sɔsi kè kú Kɔrintinɛ kɔn Luda gbɛ kè aɔɔ kú Girisi bùsunno n pínɡi. ² Luda wa De kɔn Dii Yesu Kirisio gbɛkɛɛ kɛare, à a gba aafia.

³ Wà Luda wa Dii Yesu Kirisi De sáabu kpá, De Luda wëndadɔnnɛri nɔ̀sekpaɛri pì. ⁴ È wa làakari kpáɛwe wa wahaa pínɡi guu, le wà e wà gbɛ kè aɔɔ kú baa wahaa kparee taka guuno làakari kpáɛnne se kɔn làakarikpaɛbɔ kè Luda wa làakari kpáɛoweeo. ⁵ Lán nawɛa kè Kirisi kè è liwazi nà, lɛmɛ dɔ wa làakari è kpáɛ maamaa Kirisi yānzi. ⁶ Tó wée nawɛa kɛɛ, a làakari kpaɛna kɔn a m̀sinao yānzime. Tó Luda wa làakari kpàɛ, a làakari kpaɛna yānzime, le à e à nawɛa dɔ̀nkɔ kè wée kɛɛ fɔ. ⁷ Wá tãmaa vĩ a yā musu seka sai, zaakɛ wá dɔ lán a bà kúwao nawɛakɛna guu nà, lɛn a bà kú kɔn wa làakari kpaɛnao le dɔ.

⁸ Wa gbɛnɔ, wá yezi àgɔ dɔ lán wà wée tãwa Asia bùsun nà. Wà mè òwa maamaa dɛ wa gbãa léla, baa wa wëndi wá wée dɔzi sero. ⁹ Yā dāwala, wée daa wa gamɛ. Bee wa le, le wàton zɛ kɔn wa zĩnda gbãaaoro, séde kɔn Luda kè è gèno fɛɛ gbãaa. ¹⁰ À

wa bɔ kari bíta guu, bensɔ eé wa bɔn. Àpin wá wée dɔzi à wa bɔn dɔ ¹¹ adua kè ée kɛwɛwɛ gāzĩ. Lɛmɛ gbɛnɔ é sáabu kɛnɛ pari wa yā musu gbɛkɛ kè à kèwɛ yānzi gbɛ pariinɔ aduakɛna sàabu.

Pɔlu tá gborona

¹² Yā kè wée à ĩa dāan yè: Wa laasuu e oowe kè kɔn Luda gbāaaɔ wá kú kɔn nɔsɛpuraao mɔnafiki sai anduna guu, atɛnsa a kiia. Anduna ɔndɔɔn wá kúoro, séde Luda gbɛkɛ. ¹³ Wée lá ke kɛarero, séde kè é à kyó ke à dɔɔ baasiro. ¹⁴ Lán á wa dɔ ná fète tia, má yezi à wa dɔ sãnsã, lɛ à ĩa dā wa yā musu Dii Yesu mógurɔɔ zĩ, lán wé dā a yā musu nà.

¹⁵⁻¹⁶ Bee náanɛkɛna guu má diɛ yā kè tó mée gaa Masedonia, mà bɔɛ a kiia mà a gwa káaku, mà ɛara mà su kɔn a kiio, lɛ à aubarika e gɛn plaa, gbasá à dɔnɛ kɛmɛ ma Yudea gana guu. ¹⁷ Kè ma tá beee diɛ, ma yā fɛɛ kɛn yó? Tó má diɛ mà yā ke, anduna yā è dɔmɛ aɛ mà be, lɛmɛ, lɛmɛ ke auo, auon yó? ¹⁸ Lán Luda náanɛ vĩ nà, yā kè wá òare né lɛmɛ, èe ke auonlo. ¹⁹ Luda Né Yesu Kirisi kè mapi kɔn Silasio kɔn Timotio wa à yā waazi kɛare né gbɛ kè è be lɛmɛ, èe ke auonlo, àmbɛ Luda eè ũ. ²⁰ Zaakɛ lé kè Ludaa gbɛ píngi yāpuraá è ke à guumɛ. Bee yānzi kɔn Yesu Kirisi tɔon wè be, aami, Luda tɔbɔna yānzi. ²¹ Luda bé à wa kāsāa pɛɛ Kirisi guu kɔn apinɔ, à wa diɛ a pó ũ, ²² à a sèeda kèwa, à a Ninii dà wa swɛn pó kè wé e kpégaau ũ.

²³ Ludaa ma nɔsɛ dɔ, àmbɛ ma sèedadee ũ. Kè má yezi mà a bɔbɔ a dānlo yānzin mée gá Kɔrintizi dɔro. ²⁴ Èe ke wée gbāa mɔɔare a ludanaanɛkɛna

musunlo, zaake a kāsāa pèe kò, wée zĩ keεao a pɔnnaa yānzime.

2

¹ Ben ma zeo kè mé mó a kiia kɔ̃n nòseyakanao dɔro. ² Tó má tò a nòse yàka, dé bé eé ma pɔɔ ke nnaa, tó èe ke amɔa kè ma a nòse yàkaareno baasiroo? ³ Ma takada kèare le, le tó ma mɔ a gwa, amɔa kè á de à ma pɔɔ ke nnaano tón ma nòse yakaro yānzime. Má dɔ sānsān kè ma pɔnnaa né a píngi pɔnnaame. ⁴ Ma takada pì kèare nawēa guu kɔ̃n pɔsia bítao kɔ̃n wée'io plèple, èe ke le a pɔɔ yaka yānzino, le àgɔ dɔ lán má yeazi nà yānzime.

Sùukena kɔ̃n taarideeo

⁵ Tò, tó gbēke nòseyakana yā kè, èe ke ma nòsen à yàkaro, a píngi pón à yàka, ke a gbēkenɔ, le m̀aton o à gē ɔlaro. ⁶ Īaa kè a paridee dà adee pìà m̀à. ⁷ Beee yānzi à sùu keo tia, à à làakari kpáene, le à pɔsia bíta tón à kaatero yānzi. ⁸ Beee yānzi ma agbaa kpàare, à ɔɔbanε tētēntē kè á yezi. ⁹ Àmbe à tò ma takada kèkāa kèare, ma lí pèeoawa, le mà e mà dɔ tó a yā kè má òare kũna píngi. ¹⁰ Tó a gbē kè kɔ̃n à taario, mèe adee kē se. Zaake tó ma gbē yā kēne, tó yākee gàa gɔ kuu, mèe ke a yānzi Kirisi aεzĩ, ¹¹ le Setān tón ɔ̃ndɔɔ daewaziro yānzi, zaake wá à m̀onafikino dɔ.

Luda zĩkerino

¹² Kè ma ka Toroasi le mà Kirisi baaru nnaa kpá, Dii zé b̀mε, ¹³ m̀ode ma làakari kpaenaro, kè mée ma gbēndo Titu ero yānzi. Ben ma lé zà́mma gwe, ma da Masedonia zén.

14 Ma sáabu kè Ludanɛ, zaakɛ ègɔ dɔɔwe aɛ guru pínɡi, weègɔ zɔ̀blerinɔ ũ Kirisi guu, weè à dɔ̀na gũu dagula gu sánda pínɡia. 15 Zaakɛ wá dɛ tuaetiti gũnnadee kè Kirisi kpàta Ludanɛ ũ gbɛ̀ kè èé nì m̀i siinɔ té kɔ̀n gbɛ̀ kè aɔ̀ɔe kaatɛɛnɔ. 16 Wá dɛ gè gũu ũ gbɛ̀kenɔnɛ, ben è gaa ínɛ. Wá dɛ wèndi gũu ũ gbɛ̀ kpaaanɔnɛ, ben è wèndi ínɛ. Wa dé bé à kà à zĩ beee kɛɛ? 17 Wá dɛ lán gbɛ̀ kè aɔ̀ègɔ laa taa kɔ̀n Luda yáonɔ bàro. Kirisi guu weè yá o kɔ̀n nòɛpuraa o kɔ̀n Luda dɔ̀nao à zìrinɔ ũ.

3

1 Wa ɛara wée wa zĩnda sáabu kpaan yó? Wa bà kú kɔ̀n sèeda takada kè wà kèaree ke kè á kènnɛo lán gbɛ̀kenɔ̀ bàn yó? 2 Àmbe wa takada pì ũ kè kèna wa swèa. Baade pínɡi é fɔ̀ à dɔ̀ à à kyó kɛ. 3 Èe ɔ̀ɔɔa gupuraa kè ámbé takada kè Kirisi kè à nàwe wa ɔ̀zĩ ũ. Èe takada pì kè kɔ̀n ántu'ioro, à kè kɔ̀n Luda Wèndide Niniiomɛ. Èe kè gbè walaaaro, à kè a swèamɛ.

4 Yá kè wá à náanɛ v̄in gwe Luda aɛzĩ Kirisi gāzĩ. 5 Èe kɛ wa ka wa zĩndanɛ wà be, yá pì bò wa kiianlo, Ludan wa gbāaa ũ. 6 Àmbe à wa kaa, ben wá dɛ à bà kuuna kɔ̀n gbɛ̀nɔ dufu zĩkerinɔ ũ. Èe kɛ doka kè kènanlo, Luda Nini yāme. Zaakɛ doka è gaa ínɛ, Ninii pì sɔ̀, è wèndi ínɛ.

7 Kè Luda doka kè gbè walaaa, à gakui bò Musa uua. Baa kè à tékɛna e g̀i kero, Isarailinɔ e fɔ̀ wà gwàro. Tó zé kè è gaa ínɛ pì bò kɔ̀n gakui beee takao, 8 weé Ninii pì zé gakui yá o dɔ̀ɔ? 9 Tó zé kè è yá danlaa gakui v̄i, èndɛ zé kè è tó yá bońyo nnaa

gakui deàla zã. ¹⁰ Pó kè gakui vĩ yãa gakui vĩ doro, gakui kè deàlaa pì yãnzì. ¹¹ Tó pó kè èe gí keroo bò kòn gakuio, pó kè ègõ kuu gakui deàla zã.

¹² Zaake wá tãmaa beee taka vĩ, weè yã o kòn kùgbãaao, ¹³ èe kè lán Musa bàro, kè à sáta kù a uua le Isarailino tón à uu tékena kè è gí keroo yãana ero yãnzì. ¹⁴ Mode aõ swã gbãa, zaake ai gbãa tó aõe Luda bà kuunaño takada kyó kɛɛ, sáta dõnkõ pì ègõ da ñ laasuulame. È goro, séto gbẽ kú Kirisi guu baasiro. ¹⁵ Ai gbãa tó aõe Musa takada kyó kɛɛ, sáta pì ègõ da ñ laasuulame. ¹⁶ Mode tó gbẽ aɛ dò Diia, sáta pì è goa. ¹⁷ Dii pìn Luda Nini ũ, bensõ guu kè Dii Nini pì kún, è tó wà gõ ñ zĩndane. ¹⁸ Wamowa kè pó gò wa uuanɔ, wée Dii gakui ɔɔɔańne lán dígi bà, weègõ lii lán à bà gakui gõ kaa gakuila. Dii kè de Luda Nini ũu pì kenan gwe.

4

Luda zĩrinɔ zĩ

¹ Bee yãnzì lán Luda zĩ beee dàwe a sùu guu nà, weè kpasaoro. ² Wa ɔ kpà asii wísaiyãnzì, weè yã kè kòn mɔnafikioro, bensõ weè Luda yã liɛ kpɛɛgãndaro. Weè yãpuraa ońne súusu, le wà wa zĩnda ɔɔa baade pĩngine Luda aɛzĩ. ³ Tó baaru nnaa kè wée kpaa utename, gbẽ kè aõe kaateenon à utenańne. ⁴ Zaake anduna kèkii dii Yesusaideenɔ wée vĩa kũńne, le aõton baaru nnaa sí, Kirisi kè de Luda taka ũu gakui guu puńnero yãnzime. ⁵ Wa zĩnda kpàakpan wée kɛɛro, Yesu Kirisi diikɛɛ kpàakpan wée kɛɛ, bensõ wée zĩi kɛɛare à yãnzì. ⁶ Luda bè, guu pu gusiaan, ben à guu pù wa swèn

le dɔ. Gupuraa pì de à gakui kè èe té kɛɛ Kirisi uua dɔna ũ.

⁷ Wá auziki beee vī wa mē kè de lán gù oroo bànɔ guu, le wà e wà dɔ kè gbāa bíta pì bɔ Luda kiame, èe kɛ wa kiianlo. ⁸ Wègɔ ɪa daawa kpa sānda píngia, baa kɔn beeeo weè furo. Wè bídi kɛ, mɔde wa tāmaa è yāaro. ⁹ Wè wée tāwa, mɔde Luda è wa tónlo. Wè wa pāɛ, mɔde weè garo. ¹⁰ Gurɔ píngi wá kú Yesu gaa taka bori lézĩ, le à kuuna e à ɔɔa wa mēa yānzi. ¹¹ Zaake wamɔwa kè wá bɛɛnɔ weegɔ kú gaa lézĩ Yesu yānzi, le à kuuna e à ɔɔa wa mē kè eé gaaa. ¹² Len gaa pì e zĩ kɛɛ wa guu le, bensɔ wèndi e zĩ kɛɛ a guu. ¹³ À kēna Luda yān wà bè: Má Luda náanɛ vī, ben ma yā ò. Wapinɔ sɔ wa Luda náanɛ dɔnkɔ pì kè, ben wée yā oo à yānzi. ¹⁴ Zaake wá dɔ kè lán Luda Dii Yesu fɛɛ gaan nà, eé wa fɛɛo gaan se, eé wa káɛ a aɛzĩ lɛdo kɔn apinɔ. ¹⁵ Yā kènɔ píngi e wa lee a yānzi, le Luda gbɛkɛ kè èe lii gbɛnɔzi pari e à sáabukpana kaara à tɔbɔna yānzi.

Wéɛɔna mē dufuzi

¹⁶ Beeɛ yānzi weè kpasaro. Baa tó wa mēbaa e kaatɛɛ, wa ninii ègɔ dufu kúu lán guu e dɔɔ nà. ¹⁷ Wa wéetamma néngɔ kè eé gɛɛ kèkii e gakui bíta kè è yāaroo iiwe, kè èe sí lékɔziro. ¹⁸ Wa wée pé pò kè wè wée siàlɛaro, sé pò kè wè wée siàlɛeroo. Zaake pò kè wè wée siàlɛ né gurɔplaapɔmɛ. Pò kè wè wée siàlɛeroo sɔ, ègɔ kuu gurɔ píngi.

5

¹ Wá dɔ kè tó wa sò kè wá kún kpé ũ anduna kè guu yàka, Luda é kpé kè wè dɔ kɔn ɔoro kpáwa a bɛ ai gurɔ píngi. ² Tia sɔ weè mbo sò pì guu, wá yezi wà

ludambɛ pɔ pì da, ³ zaakɛ tó wa bɔ sòn, wégɔ̃ kuu mè sairo. ⁴ Gurɔ̃ kè wá kú sò kèkii guu, weè mbo lán wá aso sɛna bà. Èe kɛ wá yezi wà bɔ à guunlo, wá yezi wà ludambɛ pɔ damɛ, lɛ wèndi wa sò kè eé gaa pì mó. ⁵ Beee yānzin Luda wa soru kezì, ben à a Ninii kpàwa pɔ kè wé e kpégaau ũ.

⁶ Beee yānzi wa kù ègɔ̃ gbāa. Wá dɔ̃ kè gurɔ̃ kè wá kú mè kèkii guu, wá kú Dii kiiaro. ⁷ Zaakɛ ludanaanɛkɛnan wá kúo, èe kɛ wéesinaàlɛ yānlo. ⁸ Wa swè ègɔ̃ kpaɛna. Bɔna sò pìn gana Dii kiian wá yezi. ⁹ Kuuna mè guun yoo, bɔna à guun yoo, weègɔ̃ wɛtɛɛ wa yā kánɛ. ¹⁰ Zaakɛ Kirisi ègɔ̃ vɛɛna a tintia, wa pínɡi wé bɔ wà zɛ à aɛ, eé fīa bo wa baadenɛ à kuuna mè guu yākɛnaa, à maaa ke à zaaa.

Gbēnteenɔ kɛna nna kɔn Ludao zī

¹¹ Lán wée vīa kɛɛ Diinɛ lɛ nà, weè wɛtɛ gbēnɔ yā pì zé e. Ludaa wa dɔ̃ sānsān, bensɔ̃ wá yezi à wa dɔ̃ a swèn lɛ dɔ̃. ¹² Wée wa zīnda sáabu kpaa a kiia dɔnlo, wée a gbaa zé à ĩa dā wa yā musumɛ, lɛ à e à yā we gbē kè è ĩa dā kɔn mēbaayāo, èe kɛ swè yānloola. ¹³ Tó ée daa wa mì lìɛ, Luda yānzimɛ. Tó wá kú wa dɔ̃rɔa, a yānzimɛ. ¹⁴ Zaakɛ Kirisi yenzi bé èe té kaawagu. Wá è tó gbē mèn doo gà gbē pínɡi yānzi, aɔ̀ gà n pínɡin gwe. ¹⁵ À gà gbē pínɡi yānzi, lɛ gbē kè aɔ̀ gɔ̃nɔ tóngɔ̃ kuu n zīnda pɔ ũ dɔ̃ro, sé gbē kè gà n yānzi à vù pɔ ũ.

¹⁶ Beee yānzi weè gbēke gwa lán anduna gbēnɔ è gwa nà tia dɔ̃ro. Baa kè wá Kirisi dɔ̃ lán anduna gbēnɔ à dɔ̃ nà yā, wá à dɔ̃ lɛ tia dɔ̃ro. ¹⁷ Zaakɛ tó gbē kú Kirisi guu, à gò gbē dufu ũ. À kuuna zii gètɛ, kuuna dufu bé à gòɛ. ¹⁸ Beee bɔ Luda kiiamɛ pínɡi.

À wa keao nna Kirisi gāzī, ben à gbēno kenaao nna zīi dāwe. ¹⁹ Kirisi guu Luda anduna kè a zīndao nna gbēno taarinɔ yā dana sai, ben à gbēno kenaao nnaa pì yā nàwe wa ɔzī. ²⁰ Beee yānzi Kirisi gēenon wa ũ. Luda e gbēno sisii wa gāzī. Wa agbaa kpàare Kirisi gbèn, à ke nna kōn Ludao. ²¹ Luda tò durunsaidee gò durun agbaakpabɔ ũ wa yānzi, le kuuna à guu Luda tó yā bɔwao nna.

6

¹ Zaake Luda zīkeri daanon wa ũ, wa agbaa kpàare, àton Luda gbēkeɛ sí à à ke pāro. ² Luda bè: Ma yā māmma a gurɔɔa, ma donle mìnina gurɔ.

Gurɔ kà sa, gbāan mìnina gurɔ pì ũ.

³ Weè yā kè eé tó gbē fuu kero, le wàton wa zīi taari ero yānzi. ⁴ Weè wa zīnda ɔɔa gbēnoɛ zé sānda píngi guu kè Luda zīkerinon wa ũ. Weè mena fɔ maamaa kōn ñadammao kōn nawēao kōn wéetāmmao. ⁵ Wà wa gbē, wà wa ka kpésiaan, wà fēewazi. Wa zī gbāaa kè, wée e wà ii òro, nɔaa wa de. ⁶ Wá òɔaíne kōn nòse purao kōn dōnao kōn sùuo kōn maakenao kōn Luda Ninio kōn yenzi mɔnafiki saio ⁷ kōn yāpura'ona kōn Luda gbāaa. Wá yāmaakebɔno kūna wa ɔplaan kōn wa ɔzεεo. ⁸ Wè wa kpe da, wè wa kpe bɔ. Wè wa tó zaaa sí, wè wa tó nnaa sí. Yāpuradeenon wa ũ, ben wè wa diε mɔnafikideeno ũ. ⁹ Tódeenon wa ũ, ben wè wa diε lán gbē kè wà ñ dōroonɔ bà. Wá bēε fá, ben wè wa diε gēno ũ. Wè wa diε pógbēnanao ũ, mɔde wè wa dero. ¹⁰ Wa pɔɔ ègɔ nname, ben wègɔ wa diε pɔsiadeeno ũ. Weè gbēno ke auzikideeno ũ pari,

ben wègɔ wa diɛ takaasideenɔ ũ. Wá pɔ́ pínɡi vĩ, ben wègɔ wa diɛ pɔ́saideenɔ ũ.

¹¹ Kɔrintideenɔ, wa yǎ òare súusu, wa wa nòse wèare. ¹² Wée wa nòseguuyǎ utearero, mɔde a a pɔ́ ùtewe. ¹³ Ma yǎ òare lán ma nénɔ bà. Lán wa wa nòse wèare nà, à a nòse wèwe le se.

Àton ke sɛnkpe kɔn Yesusaideenɔoro

¹⁴ Àton ke sɛnkpe kɔn Yesusaideenɔoro. Yǎ maaa bàa ũgba kɔn à zaaao? Bón gupura kɔn gusiaao vĩ kɔn kɔo? ¹⁵ Kirisi yǎ é kɔ́ sé kɔn Setǎn pɔ́o diamɛ? Dian Yesudee bà éɡɔ kú kɔn Yesusaideeo? ¹⁶ Luda kpé é kɔ́ sé kɔn tǎanɔó? Zaake Luda Wèndide kpén wa ũ, lán à ò nà:

Mégɔ kúnyo, mégɔ té ń té,
mégɔ de ń Luda ũ,
aǎégɔ de ma gbɛnɔ ũ.

¹⁷ Beee yǎnzi Dii bè:

À kɛ́mǎ, àgɔ kú adona,
àton ɔ ke pɔ́ gbǎsǎro,
mé a sí, ¹⁸ mégɔ denɛ De ũ,
égɔ de ma néɡɔgbɛnɔ ũ kɔn ma nénɔgbɛnɔ.
Dii Gbǎapingide bé à ò.

7

¹ Ma gbɛ yenzideenɔ, lán Luda lé gbèwe le nà, wà mì kɛ yǎ kè è mè kɔn niniio gbǎsǎ léa mámmam, wà wa kuuna adona lé papa vǎakɛna Ludaɛ guu.

Pɔlu pɔɔ kè Kɔrintideenɔa nna

² À tó wa yǎ gɔ́ kú a swèn. Wée taari ke gbɛkenɛro, wée gbɛke sǎsǎro, wée gbɛke takii kɛro. ³ Mée beee o mà yǎ daoalanlo. Má ò yǎ kè a yǎ kú wa swèn

wà ga lɛdo ke wàgɔ̃ kuu lɛdomɛ. ⁴ Má a náanɛkɛna maamaa, mɛɛ lé gbɛɛ a yã musu maamaa. Wa nawɛakɛna guu píngi ma làakari kpaɛna métemetɛ, ma pɔɔ kɛ nna à gɛ̃ ɔla. ⁵ Baa kɛ wa ka Masedonia bùsun, wa mè kpaɛnaro. Nawɛa lìgawazi kpa sãnda píngia, wà fɛɛwazi kɔ̃n swèeo, vĩa gɛ̃wagu. ⁶ Ben Luda kɛ è yɛsaideeno sé lezĩ wa sɛ lezĩ Titu mɔna guu. ⁷ Èe kɛ à mɔnan adoro, kɛ a à sɛ lezĩ yãnzime dɔ. À bèwe ée ma bɛgɛ kɛɛ, á kú tómadyãa guu, ma yã a kũna gbãa sa, ben ma pɔnnaa kàara.

⁸ Baa kɛ takada kɛ má kɛaree a nɔsɛ yàka, mɛɛ ma nɔsɛ liero. Kɛ má è takada pì a nɔsɛ yàka guro plaa, lɛ ma nɔsɛ liɛ yã, ⁹ mɔde ma pɔɔ kɛ nna sa. Èe kɛ kɛ ma a pɔɔ yàkaare yãnzinlo, kɛ a pɔsiaa tò a nɔsɛ liɛ yãnzime. A nɔseyakana pì bò Luda kiame. Beee yãnzì wée ásarɛ kɛarero. ¹⁰ Pɔsiaa kɛ bò Luda kiia, è tó gbɛ nɔsɛ liɛ à mìsina e, eé tómadyãa kero. Anduna pɔsiaa bé è gaa ínɛ. ¹¹ À gwa pɔ kɛ pɔsiaa kɛ bò Luda kiia pì ìare. A mè wã sa, a gi kɔ̃n a zĩndao, a làakari fɛɛ, vĩa a kũ, a bɛgɛ kɛ, a wɛɛ tã, a ní swã gà. Yã pì guu píngi a a zĩnda òdɔa kɛ á taari vĩ yã pì guuro.

¹² Baa kɛ ma takada pì kɛare, èe kɛ gbɛ kɛ taari kɛ ke gbɛ kɛ wà taari kɛnɛ yãnzinlo, má kɛ Luda dɔna guumɛ, lɛ a yewazina e à bɔare gupuraa. ¹³ Beee yãnzì wa làakari kpaɛna. Wa làakari kpaɛna pì gbɛra, wa pɔnnaa kàara maamaa Titu pɔnna yã musu, kɛ a píngi á tò à ninii sù yãnzì. ¹⁴ Ma lé gbɛnɛ kɔ̃n a yão yã, ée tó wí ma kũro. Lán wa yãpuraa òare yã píngi guu nà, lɛn wa légbɛna Titunɛ kɛ yãpuraa ũ lɛ. ¹⁵ Lán a bèɛ lìnɛ nà, a à kpe dà,

bensõ a à yã mà a píngi, tó à dò a yã pìn, à yenaazii è kaaramε. ¹⁶ Ma pɔɔ ègõ nna, kè má a náanekena yã píngi guu yānzi.

8

Kõkamasakena

¹ Wa gbẽno, wá yezi àgõ gbẽkεε kè Ludaa kè Masedonia bùsu sɔsinɔne dõ. ² Aõ yõagwana kɔn wéetamma pāsio guu, aõ pɔɔ kè nna maamaa, ben baa kɔn n takaaside búgubugukεεo aõ gba dà à gè ɔla. ³ Má òare aõ gba dà kɔn nòseo do n gbãa lén, à de n gbãaala se. ⁴ Aõ wée kèwa n zĩnda kúε kɔn kúεo, wà n gba zé n ɔ e àgõ kú Luda gbẽno kámasakena guu. ⁵ Aõ kè de pò kè wa wée dɔzila, aõ n zĩnda kpà Diia gĩa kɔn wapino dɔ Luda pɔyezi guu. ⁶ Beee yānzi wa wée kè Titua à gá kámasa yā kè à nàa a té mì de. ⁷ Zaake á gbãa yā píngi guu, ludanaanekena kɔn yā'onaò kɔn dɔnaò kɔn yā píngi aĩao kɔn yenzi kè á vīwao, àgõ gbãa kámasa pì kena guu dɔ.

⁸ Èe ke mée yā dieεarenlo, aĩa kè gbẽ pāndenɔ kèn mée ooare, le mà a yenzi yāpuraa dõ. ⁹ Á wa Dii Yesu Kirisi gbẽkεε dõ. Pódee ina gò pòsaidee ũ a yānzi, ben à pòsaidekεε guu à a ke pòdeenɔ ũ. ¹⁰ Lán má è nà yā pì musun yè: À kò sio amɔa kè a ze kɔn yā pìo zaa muyā bensõ ée keεno, ¹¹ à yā pì mì de sa. Zaake a sorumi mà kɔn à kenao, à ke a gbãa lén. ¹² Tó gbẽ gba dà kɔn nòseo do pò kè à vī lén, èe ke kɔn pò kè à vīroonlo, beee bé è ká. ¹³ Èe ke mée asoo lagoo gbẽ pāndenɔne, mée diiarenlo, le à ke sēnkpemε. ¹⁴ Tia lán kè bà zaake pò dìazi, à kpá gbẽ kè pò è kēsāmmaɔa, le zĩkea tó pò dìnzi, bensõ

pó kēsāawa, aǝé kpáawa. Lán beee bà éǵǵ sēnkpe.

¹⁵ Lán à kēna Luda yān nà wà bè:

Gbē kè sèe bíta pó e diziro,

gbē kè sèe fété pó e kēsāro.

Titunɔyá

¹⁶ Ma sáabu kè kōn Luda, kè à tò a yā kú Titu swēn lán à kú ma swēn nà se. ¹⁷ À wa yā mà, à mè wà à mó a gwa, lán à pɔɔ yezi nà. ¹⁸ Wa gbē doo kè à tó dàgula sɔsinɔ té ń pínɡi baarunnakpana musun wá dànɛ. ¹⁹ Beee gbɛra dɔ sɔsinɔ à dà à gáwao kámasa zīi kè wée kɛɛ kɛ. Wée zīi pì kɛɛ Dii tóbɔna yānzime kōn aīa kè wá vīio. ²⁰ Wá yezi gbēke wa taari e lán wée kɛɛ nà kōn gba bíta kè na wa ɔzī yāoro. ²¹ Èe kɛ yā kè maa Diinen wée pɛɛa adoro, yā kè maa gbēnteenɔnemɛ se. ²² Wa wa gbēndo pānde dànnɛ dɔ. Wa à làakari gwà à gēn lé vīro, wá è à aīa vī yā pínɡi guu, bensɔ à aīa èara à kàara tia, kè à a náanekena yānzi. ²³ Titu daa sɔ, ma zīkɛri daa kè weè a maaa wɛtɛ lɛdoon à ũ. Wa gbē kpaaanɔ sɔ, sɔsinɔ zīrinɔmɛ, aǝmbe Kirisi tóbɔrinɔ ũ. ²⁴ Beee yānzi à ɔdɔańɛ kè á yeńzi, lɛ sɔsi pì gbēnɔ dɔ kè lé kè wée gbēɛ a yā musu né yāpuraamɛ.

9

¹ Èe kɔ sío mà takada kēare Luda gbēnɔ kɔ kámasa kɛna pì yā musuro, ² zaake má dɔ kè a nòsɛ maaa dà, ben ma lé gbē Masedonia gbēnɔnɛ ma bè, Girisi gbēnɔ sorumi mà zaa muyā. A aīakɛna pì ń gbē parideenɔ mè fɛɛ. ³ Ben ma wa gbē pìnɔ zīawa, lɛ àǵǵ kú soru guu lán ma ò nà, lɛ lé kè wá gbē yā pì musu tón kɛ pāro. ⁴ Tó Masedonia gbēkenɔ tēmazi,

tó aĩ m̀ wà è k̀ a sorumi e maro, wí é wa kũ, k̀ wa a náanekena yānzi. Weé a ṕ o d́? ⁵ Beee yānzi má diè k̀ à maa mà o gbẽ pìnɔnɛ aĩ d́mɛ aɛ, aĩ gbaa k̀ a gĩake a à lé gbẽ yā k̀k̀ káaku, lɛ a sorumi ma, àgĩ dɛ ǹsɛdo gbaa ũ, è k̀ gba tiasinlo.

Gbadana k̄n ǹsɛo do

⁶ Àgĩ yā k̀k̄ii d́:

Tó n̄ t̀ féte, né k̀ féte,

tó n̄ t̀ bíta, né k̀ bíta.

⁷ Baade kpá lán à dà a swè guu nà uusisina sai tiasi sai. Luda a ye gbẽ k̀ è gba da k̄n p̄nnaaozi. ⁸ Luda é f̄ à tó aubarika ṕngi gĩ diazi, lɛ gurɔ ṕngi ṕ ṕngi ḿawa yā ṕngi guu ai à gĩ diazi à yā maa ṕngi k̀eo.

⁹ Lán à k̀ena Luda yān nà wà bè:

È gba da takaasideenɔnɛ maamaa,

à yāmaakena yāana v̄iro.

¹⁰ Lán Luda è ṕborii kpá ṕt̄ria nà k̄n ṕ k̀ wè bleeo, eé ṕborii kpáawa, à kaaraare, lɛ a maakena ɔgbɛ e à ɔ tá. ¹¹ Eé a k̀ ṕdeenɔ ũ yā ṕngi guu, lɛ àgĩ gba daa bítabita gurɔ ṕngi, gbẽnɔ Luda sáabu kpá gbaa k̀ á d́nnɛ wa gāzĩ yānzi. ¹² Zaake Luda gbẽnɔ ṕk̄s̄amma b̄k̄t̄en ḱmasa z̄i p̄i e k̀ adoro, eé tó Luda sáabukpana dagula maamaamɛ d́. ¹³ Gbẽnɔ é Luda t́ b̄, zaake ḱmasa k̀ á k̀ p̄i é ɔd̄ar̄nɛ, k̀ a m̄i s̄i Kirisi baaru nnaa k̀ a z̄eɔnɛ, bens̄ a gbẽk̀ k̀n̄ k̄n gbẽ ṕngio k̄n ǹsɛo do. ¹⁴ Aĩ adua keare k̄n a yāo dana n̄ swèn Luda gbẽk̀ k̀n̄ k̀n̄ p̄isiawa yānzi. ¹⁵ À Luda sáabu kpá à gbaa k̀ gè onala yānzi.

10

Pɔlu gina kɔn a zĩndao a zĩyā musu

¹ Mamɔma Pɔlu, ma agbaa kpàare kɔn Kirisi nòseyĩio kɔn à busekεεo, mamɔma kè wè be, tó má kúao má buse, tó má kúaoro sɔ, mεεgɔ pāsĩ. ² Ma wée kèawa, tó ma mɔ, àton tó màgɔ pāsĩaoro, zaake mé fɔ màgɔ pāsĩ kɔn gbě kè aɔè be anduna yā bé èe dɔɔwe aenɔo. ³ Wá kú anduna guumε, mɔde weè zĩ ká lán anduna gběno bàro. ⁴ Wa gɔkεbɔno né anduna pónlo, Luda gɔkεbɔ gbāaa kè weè zeki gbāaano gboroonomε. Weè εge leokpakɔano gboroo ⁵ kɔn wada yā kè è gínne wà Luda dɔɔo píngi. Weè laasuu píngi mile ble, le aɔ mì sie Kirisine. ⁶ Tó a mì siεwe mámmam, wa yāa kè wà wée tā swāyāmarisaideenɔa.

⁷ Èe yā gwa musumε. Tó gbě a zĩnda náanekena kè Kirisi pón a ũ, adee gɔ dɔn kè Kirisi pón wa ũ lán à bà se. ⁸ Baa tó ma lé gbě à kè bíta iko kè Dii kpàwa yā musu, wí é ma kũro, zaake a kāsāpεena yānzime, èe ke a leena yānzino. ⁹ Àton ke lándɔ má yezi mà vĩa dadaazi kɔn ma takadakēnao bàro. ¹⁰ Wè be ma takadano bēε vĩ, bensɔ aɔ gbāa, mɔde tó wà wée sìmale, è n kũ gbāaro, ma yā è ká póke lészĩro. ¹¹ Gbě kè aɔɔe oo leeno gɔ dɔ kè lán wa yāno de nà takadano guu tó wá kúaoro, len wé ke le, tó wa kɔ è.

¹² Dén kèwe wà wa zĩnda ke sēnkpe kesɔ wà wa zĩnda lèkɔzi kɔn gbě kè aɔɔe n zĩnda sáabu kpaano. Tó aɔ n zĩnda kpàkɔsɔ kɔo kesɔ aɔ n zĩnda lèkɔzi kɔo, aɔègɔ ɔndɔro. ¹³ Wamɔwa sɔ, wé lé gbě à gē ɔlaro. Wé lé gbě ikokekii kè Ludaa diεwe lémmε, kè à kà a kiia se. ¹⁴ Lán wa ka a kiia nà, wée vĩ wa ikokeki lélaro, zaake wa mɔ kɔn Kirisi baaru nnaao ai a

kiia káaku. ¹⁵ Weè lé gbě à gè ɔla wà gbě pāndenɔ zĩ ká wa pólaro. Zaake a ludanaanekena e kaara, wá yezi zĩ kè wée kee a té ɔ tá maamaa ai à ká ikokekii kè Ludaa diewe lén, ¹⁶ le wà gá wà baaru nnaa pì kpá bùsu kè kú a aenɔ guu, légběna kɔn gbě pāndenɔ kāndagbɛbanao sai. ¹⁷ Tó gbě yezi à lé gbě, à gbě Dii yā musu. ¹⁸ Èe ke gbě kè è a zĩnda sáabu kpá bé à maaro, sé gbě kè Dii è à sáabu kpá.

11

Pɔlu kɔn zĩri egeenɔ

¹ À menamao kɔn ma yɔnkɔkeeo féte. Mɔde ée menaa kò. ² Lán Luda è nɔsegɔaanɔ kpá nà, lén mée kpaa le se a yā musu. Ma a kpa gɔ mèn dooa, àmbe Kirisi ũ, le mà a kpāsāa nɔkpare lezii ũ. ³ Lán mlè ɔndɔ kè Awauzi nà à à sāsā, vĩa e ma kũu kè eé a laasuu likɔaare le se, le à a nana Kirisia gbāsĩ sai kɔn nòseo do tó. ⁴ Tó gběke mò à Yesu yā kè bò ado kɔn wa póo waazi kèare, eè wezi aaga. Èe ninii kè bò ado kɔn kè á sio sí, eè baaru nnaa kè bò ado kɔn kè á mào ma. ⁵ Mée daa má kēsāna zĩri kè a rí díe bíta mɔnɔzi yāke guuro. ⁶ Baa tó ma lé nnaro, má dɔna vĩ. Wá òdɔaare a píngi tètɛntɛ yā píngi guu.

⁷ Kè ma baaru nnaa kè bò Luda kiia waazi kèare pósinaawaa sai, ben ma a zĩnda bùsa a kaarana yānzi, ma taari kèn yó? ⁸ Ma sɔsi pāndenɔ takii kè, ma a asaia èm̃ma, le mà e mà zĩ keo a té yānzi. ⁹ Gurɔ kè má kúao, tó pó e kēsāama, mée ĩa da gběkearo. Wa gbě kè aɔ bò Masedonia bùsunno mòmɛ kɔn pó kè èe kēsāamaao. Mée we mà ke a gběkenɛ asoo ũro, bensɔ mé we mà ke a gběkenɛ asoo ũro. ¹⁰ Kɔn Kirisi yāpuraa kè kú ma

guuo, gbēke é kpáme mà lé pì gbē Girisi bùsunlo.
¹¹ Bóyānzin má ò lezi? Ludaa dō kè má yeazi.

¹² Yā kè mée kēē, mégō kēēmē, le mà gbē kè aōē nī zī lēkōzi kōn wa pōnō kāsāa kēē kōn nī lēgbēnanō. ¹³ Gbē beee takanō né zīri egēenōmē! Zīkeri mōnafikideenōmē! Aōē li Kirisi zīrinō ũ.
¹⁴ Yābōnsaenlo. Baa Setān pì è li gupura malaika ũ se. ¹⁵ Zaake lēmē, tó à zīkerinō li yā maaa zīkerinō ũ, yābōnsaenlo. Zāazāa aōē nī yākena gbè e.

Pɔlu nawēakena a zīrikēē guu

¹⁶ Ma eara mée oo dō, gbēke tón ma gwa yōnkōō ũro. Tó len sōro, àgō ma diē lán yōnkōō bà, le mà e mà lé gbē fété. ¹⁷ Yā kè mée oo, Dii bé à ma danlo. Lé kè mée gbēē ma zīnda náanekena guu, mée gbēē mīsaikēē guumē. ¹⁸ Zaake gbēnō e lé gbēē nī zīnda yā musu pari, mapi se mé gbē. ¹⁹ Zaake a ōndōrinō eē mēna fī kōn mīsaideenō kōn pōnnaao. ²⁰ Tó wēē a kēē zōnō ũ, tó wēē a aru mīi, tó wēē a takīi kēē, tó wēē dēnlāa dōōaare, tó wēē a swān kēē, eē mēna fī.
²¹ Yāpuramē, wā busē kōn yā beeenō kenao! Beee kēmē wíyā ũ! Mōde pō kè gbē náanekena, èē à lé gbēē, má à náanekena se. Mée beee oo yōnkōkēē guumē.
²² Eberunōn nī ūó? Àmbe ma ũ se. Isarailinōn nī ūó? Àmbe ma ũ se. Ibraī boriinōn nī ūó? Àmbe ma ũ se. ²³ Kirisi zīkerinōn nī ūó? Má à zīkeri ũ dēñla. Mée oo lán īadee bàme. Ma zīi kè dēñla, wā ma da kpésiaan dēñla, má a gbēna gēn lé dōro, ma kuuna gaa lézī gēn lé vīro. ²⁴ Yudanō ma gbē kōn flāo lé baplaa mēn dosai ai gēn sōoro. ²⁵ Wā ma lēlē kōn gōo gēn aagō. Wā ma papa kōn gbēo gēn do. Góro'ite lé kùemao gēn aagō, ma kē guro do ísīaa guu

fãantẽ kɔ̃n gwãavĩo. ²⁶ Ma wétegana paridee guu mɛ̀ɛgɔ̃ kú kari guu: Swa kari, kpáí wéedewenɔ̃ kari, Yudanɔ̃ kari, bori pãndenɔ̃ kari, wéte guu kari, sête kari, ísia kari, Yesude ɛgɛenɔ̃ kari. ²⁷ Ma zĩ gbãaa kè kɔ̃n wãwãao, ma itẽ kè à gɛ̀n lé vĩro, nɔ̃aa ma de, ímii ma de, mɛ̀ɛgɔ̃ kuu pɔ́blee sai gɛ̀n baaagɔ̃, má té bũu ãa guu. ²⁸ À kpaaanɔ̃ ona baasi sɔ̃sinɔ̃ pínɡi laasuu è ãa dama lán guu e dɔ̃ɔ̃ nà. ²⁹ Dé bé eé busa, mà gí busazii? Dén weé kè zéa à gí òmazii?

³⁰ Tó à kɔ̃ sio mà lé gbẽ, mé gbẽ ma gbãasaikɛɛ musumɛ. ³¹ Luda wa Dii Yesu Kirisi Dee dɔ̃ kè mɛ̀ɛ ɛgɛɛ tooro. Wãgɔ̃ à sáabu kpaa gurɔ̃ pínɡi! ³² Gurɔ̃ kè má kú Damasiku, ben kí Areta asakpaa bè wà wéte pì bĩilenɔ̃ dákpa, le wà e wà ma kũ yãnzì, ³³ ben wà ma bɔ̃ wíndo guu, wà ma pita kɔ̃n bào gbíi guu bĩi kpɛɛ, ben ma bàa sì.

12

Pɔ̃lu wéegupu'ena

¹ À kũ tiasi mà lé gbẽ. Baa kè à àre vĩro, mé lé pá wéegupu'enanɔ̃a kɔ̃n yã kè Dii òdɔ̃amɛenɔ̃o sa. ² Má gbẽke dɔ̃ Kirisi guu, wà à sè wà gàao ai ludambe aagɔ̃deen, à wẽ gẽro dosain yè. À gàa kɔ̃n mèon yó, mè sain yó, má dɔ̃ro, sé Luda. ³ Má dɔ̃ kè wà adee pì sè wà gàao ai auzennammɛ. À gàa kɔ̃n mèon yó, mè sain yó, Luda bé à dɔ̃. ⁴ À yã kè è sí oroo mà, kè gbẽntee é fɔ̃ à tɔ̃kɛroo. ⁵ Mé lé gbẽ adee yã musu, mé gbẽ ma zĩnda yã musuro, sé ma gbãasaikɛɛ yã. ⁶ Baa tó mé lé gbẽ, èe ke má yɔ̃nkɔ̃nlo, zaake yápuraan mé o. Mòde mé lé gbẽro, le gbẽke tón ma diɛ de pó kè à èma ke yã

kè à mà ma lénlaro. ⁷ Le màton ïa dā yā bíta kè Ludaa òdɔamɛɛnɔ musuro yānzi, à pó sòtɔ ma mè guu Setān zìri ũ, àgɔ wée tãama, le màton ïa dāro yānzi. ⁸ Ma wée kè Diia gènn aagɔ yā pì musu, le à pò pì bɔ ma mèn, ⁹ ben à bèmɛ, a gbɛkɛɛ kè eè kɛmɛ mòmɛ. Gbāasaikɛɛ guun a gbāa papana è bɔn. Beee yānzi mé lé gbɛ kɔn pɔnnaao ma gbāasaikɛɛ musu, le Kirisi gbāaa gɔ kú ma guu. ¹⁰ Àmbe à tò mɛɛ pɔnnaa kɛ kɔn gbāasaikɛɛo kɔn wídammao kɔn nawɛao kɔn ïadammao kɔn wétámmao Kirisi yānzi, zaake gurɔ kè ma gbāaa kēsáman mɛgɔ gbāa.

Kɔrintideenɔ yā Pɔlu kúna gbāa

¹¹ Ma yɔnkɔyā kè, ámbé a ma dan. Ámbe à dɛ yā à ma sáabu kpá. Baa tó má kuu póke ũro, má kēsána zìri kè a n díe bíta mònɔzi yáke guuro. ¹² Ma a zìrikɛ òdɔaare kɔn mɛnao maamaa sèedakenanɔ kɔn yābɔnsaenɔ kɔn dabuyānɔ guu. ¹³ Bó bé à a kēsá sɔsi kpaaanɔ? Ke kè mée gɔ a gbɛkenɛ asoo ũro yānzimɛ? À sùu kɛmao kɔn taari beeeo! ¹⁴ Tia sa ma soru kè mà mó a kiia à gènn aagɔdeeo, mé sɔ gɔ a gbɛkenɛ asoo ũro. Ámbe mée a wɛtɛɛ, èe kɛ a pónɔn mée wɛtɛɛro. Zaake denɔ bé wè auziki diɛ n nénɔnɛ, èe kɛ nénɔ bé wè diɛnɛro. ¹⁵ Mé fɔ mà pó kè má vī dɛare píngi, mà a zīnda kpáawa kɔn pɔnnaao. Tó ma yeazina e kaara, a yemazina é lagon yó? ¹⁶ Baa kè a wezi kè mée gɔare asoo ũro, gbɛnɔ è be wéézɛrin ma ũ, ma pó siawa kɔn òndɔɔ. ¹⁷ Ma a ble gbɛ kè ma n zīawaanɔ ke gāzī? ¹⁸ Ma kúɛ kè Titunɛ à gá a kiia, ben ma wa gbɛndoo dānɛ. Titu a blen yó? Wa nòsɛ dɔnkɔnloo? Wa tuuba dɔnkɔnloo?

19 Èe daa yā wée bókii weteen yó? Lenlo! Wée yā oo kōn Luda dōnao kuuna Kirisi guume. Ma gbē yenzideenō, ma beee òare píngi a kāsāpēena yānzime. 20 Vīa e ma kūu kè tó ma mō a kiia, mé a le lán má yezi nàro, bensō é ma e lán ée kpákpa a nàro. Mée vīa kē swèene kōn nòsegāanō kōn pōfēo kōn aīa pāsō kōn kōyakanao kōn kōpenao kōn īadānao kōn zōkakanao. 21 Vīa e ma kūu kè tó ma εara ma mō a kiia, ma Luda é tó wí ma kú a aεzī. Gbē kè aō durun kè yā, aō gbāsī kè, aō pāpāa kè, aō wísaiyā kēnō, tó aōe nòse lie wà mì kè yā pìnōaro, mé pōsiaa kēnyo.

13

Lédammana zāa

1 À gēn aagōdeen yè kè mé mó a gwa. Wè yā píngi yāpura a ma sèedade gōn plaa ke gōn aagō lēzī. 2 Ma gīake ma lé dà gbē kè aō durun kēnōa yā kōn gbē kpaaanō dō ma mōna a kiia gēn plaadeeo, tia ma εara mée lé daańma dō baa kè má kúaoro, tó ma εara ma mō dō, mé í gbēke tóro yoo. 3 Èe sèeda wete kè Kirisi e yā oo ma gāzīn yó? Tò! Èe ke Kirisi gbāaa sainlo, à gbāa a té. 4 Baa kè à gà lía gbāasaikē guu, à kuu tia kōn Luda gbāaaome. Leme kuuna à guu wá kú kōn gbāasaikēo le se, mode wégō kúo a té kōn Luda gbāaa.

5 À a zīnda tàasi ke à gwa, tó á kú Yesu Kirisi náanekena guu. À keke à a zīnda gwa. Á dō kè Kirisi kú a guuroo? Tó lenlo, a funame. 6 Má dō kè é e kè wée furo. 7 Wée wée kē Ludaa, le àton à zaa ke kero. Èe ke le gbēnō wa zī sáabu kpá yānzinlo, le à à maaa ke yānzime, baa tó wèe wa gwaa gbē funanō ũ. 8 Wé

fɔ̃ wà bɔ̃ yãpuraa kpɛɛro, sé wà zéo. ⁹ Tó wá gbãa vĩro bensɔ̃ á gbãa, wa pɔɔ ègɔ̃ nname. Weè adua keare, le à keke à bɔ̃ maa. ¹⁰ Ma yã beeenɔ̃ kɛ̃are kè má kúaro, le tó ma mɔ̃, màton keare pásĩ kɔ̃n iko kè Dii kpàmaaoro. À kpàma a kāsāpɛena yānzime, èe ke a lɛena yānzinlo.

¹¹ Tò, ma gbɛ̃nɔ̃, à pɔ̃nnaa ke. À yã keke à bɔ̃ maa. À ma lédamma ma. À lédole ke àgɔ̃ nna kɔ̃o, Luda yenzide aafiadee gɔ̃ kúao. ¹² À ì kpákɔ̃a kɔ̃n Luda gbɛ̃nɔ̃ lɛpɛmmanao. Luda gbɛ̃nɔ̃ ì kpàawa í píngi. ¹³ Dii Yesu Kirisi gbɛ̃kɛ keare, Luda gɔ̃ yeazi, kɔ̃gbɛ̃kɛ gɔ̃ kú a té kɔ̃n Luda Ninio a píngi.

Luda yá takada kǝn Bokobaru yáo
The New Testament and portions of the Old Testament
in the Bokobaru language of Nigeria

copyright © 2005 SIM International

Language: Bokobaru

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-09-22

PDF generated using Haiola and XeLaTeX on 11 Nov 2022 from source files dated 9 Oct 2020

c31548a1-5316-53c2-be42-674e0e4c5ae5